

VERVOLGING IN DIE 10/40-VENSTER

WEEK 3



24-7 GEBED VIR HERLEWING 25 NOVEMBER – 1 DESEMBER 2024

As julle aan die wêreld behoort het, sou die wêreld julle as sy eiendom liefgehad het. Omdat julle egter nie aan die wêreld behoort nie, maar Ek julle uit die wêreld uitgekies het, daarom haat die wêreld julle.
(Johannes 15:19)

Die 10/40-Venster strek tussen 10 grade noordbreedte (Noord-Afrika) en 40 grade noordbreedte (Midde-Ooste en Asië). Dit word dikwels "Die Weerstandbiedende Gordel" genoem, en sluit die meerderheid van die wêreld se Moslem-, Hindoe- en Boeddhistiese nasies in. In hierdie derde deel van 'n reeks van 3, 'Vervolging in die 10/40-Venster', bid ons vir hierdie broers en susters in Christus wat daaglik teenstand en vervolging ervaar weens hul geloof in Jesus, om getrou te bly te midde van lyding.

MAANDAG 25 NOVEMBER 2024 NOORD-KOREA – OOS-ASIË

Dink aan die gevangenes asof julle self ook gevangenes is, en aan dié wat mishandel word, asof julle self ook mishandel word. (Hebreeërs 13:3).

Bevolking: 26 498 823

Dominante godsdienst: Nie-godsdienstig

Evangeliese Christene: 1%

Baie min is bekend oor die Kerk in Noord-Korea, behalwe die feit dat dit oorleef het in die aangesig van die ergste vervolging. Die Kerk in Noord-Korea funksioneer heeltemal ondergronds met byeenkomste en aanbidding wat in die geheim gehou word. Lede weet dat as hulle gevang word, hulle in die tronk of in 'n arbeidskamp sal beland. As gevolg van intense regeringsbeheer oor die media, het die meeste Noord-Koreane nog nooit die naam van Jesus gehoor nie.

Kom ons bid

- Bid dat die ondergrondse kerk rein, ywerig vir die waarheid en diep toegewyd aan Christus sal wees.
- Bid dat wanneer gelowiges die Bybel lees, hulle dit sal kan verstaan. Vra dat hulle lewens getransformeer sal word daardeur en dat hulle sal groei in die genade en kennis van die Here en Verlosser, Jesus Christus (2 Petrus 3:18a).
- Bid vir die Kerk in Noord-Korea om standvastig en getrou te bly in die soeke na God se hart, ten spyte van vervolging wat hulle in die gesig staar vir hul geloof.

DINSDAG 26 NOVEMBER 2024 KIRGHIZSTAN – SENTRAAL-ASIË

Julle sal ter wille van my Naam deur almal gehaat word. Maar wie tot die einde toe volhard, sal gered word...
(Matteus 10:22-23).

Bevolking: 7 186 009

Dominante godsdiens: Soennitiese Islam

Evangeliese Christene: 0,4%

Moslems is geneig om weerstand te bied teen die Evangelie. Hulle sal gelowiges dikwels intimideer deur óf fisiese geweld óf deur hul eiendom te beskadig. Die vele behoeftes van die armes, gestremdes en bejaardes bied egter 'n oop deur vir die Liggaam van Christus om die liefde van Jesus aan "die geringstes van hulle" te openbaar. Die Christelike geloof het groot groei na kommunisme beleef en hoewel hierdie groei verlangsaam het, is die Kerk besig om volwasse te word.

Kom ons bid

- Bid dat die aantal gelowiges sal toeneem. Ook dat hulle getrou sal bly ten spyte van vervolging. Bid dat hulle 'n volhoubare inkomste sal genereer om in Kirghizstan te kan bly en hul geloof met ander te deel.
- Bid vir Christene om die liefde van Jesus te weerspieël deurdat hulle alle verhoudings en die huwelik volgens die Bybel eer.
- Vra die Here vir elke gewonde hart om beide die liefde van Jesus Christus en die ware vrede van die Evangelieboodskap te ervaar (Johannes 16:33).

WOENSDAG 27 NOVEMBER 2024

LIBIË – NOORD-AFRIKA

... Wees liever bly hoe meer julle in die lyding van Christus deel, want dan sal julle ook oorloop van vreugde by sy wederkoms in heerlijkheid. (1 Petrus 4:12-13).

Bevolking: 7 381 023

Dominante godsdiens: Soennitiese Islam

Evangeliese Christene: 0,3%

Vandag is hierdie nasie een van die mees onveilige lande in die wêreld om 'n Christen te wees. Alhoewel buitelanders wetlik toegelaat word om God te aanbid, is dit onwettig vir hulle om die Evangelie met Libiërs te deel. Sendelinge word gearresteer, en die meeste Christen-uitgewekenes het getrek. Christene moet hul geloof in die geheim beoefen. Om saam te vergader is byna onmoontlik. Die meerderheid bekeerlinge het van Jesus Christus gehoor deur een-tot-een evangelisasie of drome.

Kom ons bid

- Bid dat die Libiese Kerk 'n skynende lig sal wees, in Libië maar ook verder. Bid vir die getuienis van hulle lewens om die Libiese Kerk te help groei en uit te brei (Psalm 97:11).
- Bid dat Jesus Homself deur visioene en drome aan beide gematigde en ekstremistiese Moslems sal openbaar, veral diegene wat invloedryke posisies in die samelewing beklee.
- Bid vir Christene om toegang te hê tot veilige ruimtes om bymekaar te kom vir aanbidding (Psalm 17:8).

DONDERDAG 28 NOVEMBER 2024

MALEDIVE – SUID-ASIË

Hoe sal hulle dan Hom aanroep in wie hulle nie geglo het nie? En hoe sal hulle glo in Hom van wie hulle nie gehoor het nie? En hoe sal hulle hoor sonder 'n prediker? (Romeine 10:14).

Bevolking: 527 799

Dominante godsdiens: Soennitiese Islam

Evangeliese Christene: 0%

Slegs die Evangelie van Lukas en Handelingte is tans in Dhivehi beskikbaar. Selfs hierdie Skrifgedeeltes word nie toegelaat om die land binne te gaan nie. Geen sendingwerk of Christelike literatuur word wetlik op die eilande toegelaat nie. Met min of geen toegang tot die Evangelie binne hierdie geïsoleerde eilande, is 'n ware wonderwerk nodig om hoop en verlossing aan die mense te bring. Daar is geen vryheid van godsdiens nie. Islam is die amptelike en enigste godsdiens; al die ander is onwettig.

Kom ons bid

- Bid vir kreatiewe maniere vir sendelinge om na die Maledive te gaan. Vra die Here om vir hulle kreatiewe maniere te wys om te bedien en vir wysheid aan frontlinie-werkers wat in die Maledive dien.
- Bid dat die Bybel in die plaaslike taal vertaal sal word sodat geheime gelowiges toegang daartoe kan kry. Bid dat Malediviërs die Evangelie kan hoor sodat nuwe gelowiges 'n openbaring van Sy liefde en genade deur Sy Woord kan ontvang.
- Bid vir Christene om in die lig te lewe soos Hy in die lig is (1 Johannes 1:7).

VRYDAG 29 NOVEMBER 2024

SOEDAN – NOORD-AFRIKA

Wie kan ons van die liefde van Christus skei? Lyding of benoudheid of vervolging, honger of naaktheid, gevaar of swaard? (Romeine 8:35).

Bevolking: 50 448 963

Dominante godsdiens: Islam

Evangeliese Christene: 0,4%

Die vyandigheid wat Soedanese Christene in die gesig staar is veral erg buite die hoofstad, Khartoum, waar die meeste Christene woon. Die vlakke van druk en geweld wat Christene wat etniese Afrikane of bekeerlinge van 'n Moslem-agtergrond is, in die gesig staar, is besonder hoog. Baie is in hegtenis geneem en aangekla van misdade soos spioenasie. Gelowiges staar hewige vervolging in die gesig, met diegene in die Nuba-berge wat die ergste in die gesig staar.

Kom ons bid

- Bid vir 'n einde aan die geweld in Soedan en vir voorsiening vir Christene wat ontwortel is.
- Bid vir die Kerk van Soedan, dat gelowiges verenig sal wees en ondersteuning en gemeenskap sal vind ten spyte van dalende getalle.
- Bid dat gelowiges getrou sal bly in die aangesig van verhoogde druk en elke geleentheid sal gebruik om die liefde en die waarheid van Jesus uit te leef.

SATERDAG 30 NOVEMBER 2024
MAURITANIË – NOORDWES-AFRIKA

Almal wat in Christus Jesus toegewy aan God wil lewe, sal ook vervolgt word. (2 Timoteus 3:12).

Bevolking: 5 169 395

Dominante godsdien: Islam

Evangeliese Christene: 0,1%

Die Christendom in Mauritanië word as 'n negatiewe Westerse invloed beskou. Christenbekeerlinge ondervind hewige vyandigheid van die owerheid sowel as van hul gesinne. Om van Islam af te draai is wetlik strafbaar met die dood, hoewel daar die afgelope paar jaar geen bekende voorbeelde hiervan is nie - maar die bedreiging bly. Bekeerlinge loop ook die risiko om uit hul gesinshuis geskors te word en lewensbestaan te verloor. Hulle kan selfs gedwing word om die land te verlaat.

Kom ons bid

- Bid vir Christene om die Evangelie vrymoedig met die ongereddes in hulle nasie te deel.
- Bid asseblief vir God om bekeerlinge aan te moedig om Christus te volg, ten spyte van uitdagings en gevare. Vra die Heilige Gees om hulle te bedien waar hulle nie gemeenskap met ander gelowiges het nie.
- Bid vir goddelike inheemse leierskap om in Mauritanië te ontwikkel. Ook vir 'n toename in die vryheid van godsdien, beide sosiaal en wetlik.

SONDAG 1 DESEMBER 2024
MIANMAR (BIRMA) - SUIDOOS-ASIË

Vind jou vreugde in die Here, en Hy sal jou gee wat jou hart begeer. (Psalm 37:4).

Bevolking: 54 500 091

Dominante godsdien: Boeddhisme

Evangeliese Christene: 5,1%

Die militêre junta jag en vermoor Christene. Die meeste Christene neem nie deel aan die gewapende konflik nie. Baie Christelike pastore, leiers, hulpwerkers, maatskaplike werkers en evangeliste het weens hierdie konflik gesterf. Hierdie toegewyde Boeddhistiese land toon tekens van ontvanklikheid vir die Evangelie van Jesus Christus, veral Mianmar se jeug ondersoek ander gelowe.

Kom ons bid

- Bid vir 'n herlewing regdeur Mianmar en vir God om 'n nuwe generasie Christen-gelowiges uit die jeug in die land op te rig (Psalm 107:37).
- Bid vir God se vertroosting vir Christene wat uit hul huise gesit en gedwing word om in die oerwoude te woon. Bid vir God se bonatuurlike voorsiening vir hulle.
- Bid dat die destabiliserende elemente in Mianmar afgebreek sal word en dat Boeddhiste voor die Koning van die konings en die Here van die here sal buig (Psalm 72:11).